



## AKTUELNOSTI

### **Društvene mreže u pravosuđu kao službeni kanali komunikacije** **Dobre prakse Tužilaštva Distrikta predstavljene na TAIEX konferenciji**

**U saradnji TAIEX-a, instrumenta tehničke pomoći Evropske Unije i Visokog sudskog i tužilačkog vijeća Bosne i Hercegovine (VSTV), 20. juna u Sarajevu predstavljene su Smjernice za korištenje društvenih mreža, kao zvaničnih kanala komunikacije pravosudnih institucija.**

Konferencija održana tim povodom okupila je preko stotinu učesnika, među kojima i istaknute članove VSTV-a, rukovodioce sudova i tužilaštava, sudije, tužioce, stručno osoblje, kao i međunarodne eksperte, uz čiju pomoć su izrađene i predstavljene prve smjernice za rad pravosuđa u ovoj oblasti. Na koji način pravosudne institucije i nosioci pravosudnih funkcija trebaju koristiti društvene mreže kao zvanične kanale komunikacije centralno je pitanje Smjernica koje je VSTV usvojilo na sjednici održanoj 15. maja. To je ujedno bila i tema konferencije na kojoj se govorilo o prednostima i nedostacima društvenih mreža, ali i o iskustvima pravosudnih institucija koje su od ranije prepoznale značaj ovakvog načina javnog komuniciranja, među kojima su ponajprije Tužilaštvo Brčko distrikta BiH i Općinski sud u Tuzli. U okviru panela na tu temu, predsjednik ovog suda Muhamed Tulumović i sekretar Tužilaštva Distrikta Samir Beganović predstavili su ciljeve, pozitivna iskustva i prednosti korištenja službenih *Facebook* stranica pravosudnih institucija iz kojih dolaze.

Kao panelista na ovu temu, Samir Beganović prije svega je istakao da je transparentnost u ovoj pravosudnoj instituciji postavljena kao apsolutni strateški cilj, naglasivši da službena *Facebook* stranica ovog tužilaštva, kao prva internetska platforma ovog tipa u pravosuđu u BiH, služi upravo tom cilju, naročito u sferi dodatnog unapređenja proaktivne i dvosmjerne komunikacije. Pored ostalog, on je dodao da otvaranje službene stranice na *Facebooku* nikako ne podrazumijeva prestanak korištenja drugih kanala komunikacije, uključujući tradicionalne, već im, naprotiv, služi kao dodatni, komplementarni servis. Takođe, uz internetsku stranicu na koju se sadržajno naslanja, *Facebook* stranica Tužilaštva Brčko distrikta BiH stalno je dostupna *online* informativna platforma namijenjena dijelu javnosti kojem su društvene mreže primarni izvor informacija - zaključio je Beganović. Osvrnuvši se na nedavno usvojene Smjernice, on je ocijenio da su u cijelosti kompatibilne s dosadašnjom praksom, općim strateškim pristupom i komunikacijskom vizijom ove institucije.

U skladu s općom i komunikacijskom strategijom Tužilaštva Distrikta, sve planske akcije koje se preduzimaju u pogledu unapređenja efikasnosti, efektivnosti i kvaliteta, te održavanja apsolutne nezavisnosti, integriteta i transparentnosti, treba da rezultiraju jačanjem javnog povjerenja u pravosuđe, tako da pravosudne institucije budu prepoznate kao visoko uspješne i javno odgovorne institucije u službi građana i javnog interesa.

**GLAVNI TUŽILAC**  
**ZEKERIJA MUJKANović**